

**Uunga siunnersuut: Kommunit suliffeqarfinnik pigisaasa sanaartukkanillu pigisaasa
ilaasa pisiarinerinut, qularnaveeqqusernerinut attartornerannulluunniit akuersisarneq
pillugu Inatsisartut inatsisaat nr. xx, xx. xxx 2018-imeersoq.
Aningaasaqarnermut Naalakkersuisumit saqqummiunneqartoq**

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneernejarneranut

ISUMALIUTISSIISUTAA

Ataatsimiititaliap suliarinninnermini kingullermik ilaasortarai:

Inatsisartunut ilaasortaq Karl Kristian Kruse, Siumut, siulittaasup
Inatsisartunut ilaasortaq Sara Olsvig, Inuit Ataqatigiit, siulittaasup tullia
Inatsisartunut ilaasortaq Niels Thomsen, Demokraatit
Inatsisartunut ilaasortaq Jess Svane, Siumut
Inatsisartunut ilaasortaq Aqqaluaq B. Egede, Inuit Ataqatigiit
Inatsisartunut ilaasortaq Tillie Martinussen, Suleqatigiissitsisut
Inatsisartunut ilaasortaq Mala Høy Kuko, Siumut

UKA 2018-imi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Suliffeqarfiit kommunit immikkoorlutik ataatsimulluunniit, toqqaannartumik toqqaannangitsumilluunniit aningaasaatit 50 procentii sinnerlugit piginnittuunerisigit imaluunniit taasisinnaasut 50 procentiinik amerlanerusunik taasisinnaatitaanerisigit kommuninit pigineqartut, kommunalbestyrelsimit akuerineqaaqaarnani inissianik, atuarfinnik, aqqusinernik tamanut atugassianik il. il. suliffeqarfiup allanut pisussaaffiitut qularnaveeqqusiissutigineqarsinnaanginnissaat siunnersuutigineqarpoq. Suliffeqarfiit taamaattut akiitsornissaat il.il. pisuni amerlasuuni tamat oqartussaaqataanerannik tunngaveqarluni aalajangiiffigisassanngorlugit kommunalbestyrelsimut saqqummiunneqartarnissaat maleruagassatigut qulakkeernejassaaq.

Suliffeqarfik kommuninit pigineqartoq annikinnerpamik 25 procentimik akiliisinnaassuseqarpat kommunalbestyrelsi taamaallaat akuersisinnaassasoq siunnersuutigineqarpoq, tamatumani ilanngullugit naatsorsorneqassallutik akiitsut akuersissummik qinnuteqarnermut ilanngunneqartussat. Aammattaaq pigisat il.il. qularnaveeqqusiunneqartut sanaartukkat, pisiat imaluunniit inissianik nutaanik, atuarfinnik aqqusinernulluunniit tamanut atugassanut sanaartukkanut taarsigassarsianut il.il. qularnaveeqqusiunneqarnissaat taamaallaat akuersissutigineqarsinnaassasoq siunnersuutigineqarpoq. Taamattaaq isumaqatigiissut suliffeqarfiup kommuninit pigineqartup pineqartumi suliasanik ingerlatsisinnaaneranut pisariaqartuussaaq.

Kiisalu atuisut akiliutaasa pisortallu aningaasartuutaasa annikillissutaat sanaartukkamut, pisinnermut, sananermut il.il. aningaasartuutitut minnerpaamik matussusiisinaanerat toqqammavigineqartassasoq siunnersuutigineqarpoq. Sorluttaaq aningaasaliinerit pineqartut ungasissumut sammisumik attanneqarsinnaasumillu aningaasaqarnikkut politikeqarnermut tapertaassasut, tamatuma ilaatigut kingunerissavaa pisortat pisussaaffii piffissap ingerlanerani akiliisinnaassutsimit sukkanerusumik qaffakkiartunnginnissaat. Tamatuma saniatigut akuersissutit kommuninit nalunaarutigineqartut nalunaarsorsimaffiata kommunit naatsorsuutaannut ilanngunneqartarnissaanik piumasaqaammik aalajangersaasoqarpoq.

Siunnersuutip Inatsisartunit siullermeerneqarnera

Siunnersuut ilusimisut iluseqartut nalinginnaasumik taparserneqarpoq, naak kommunit annertunerusumik akuliutsinneqarnissaat siunertaralugu siunnersuutip aappassaaneerneqarnissaata pingajussaaneerneqarnissaatalu UPA 2019-imut kinguartinneqarnissaa partiinit ataasiakkaanit kissaatigineqaraluartoq.

Tusarniaaneq

Siunnersuut piffissami 18. juni 2018-imit 16. juli 2018-ip tungaanut tusarniaassutigineqarpoq. Kommunip ataasiinnaap tusarniaanermut akissuteqarsimanera siunnersuutip siullermeerneqarnerani immikkut maluginiarneqarpoq. Tamatumunnga suna pissutaanersoq ataatsimiititaliamit ilisimaneqanngilaq, ataatsimiititaliarli isumaqarpoq tusarniaanernut aasap ingerlanerani ingerlanneqartariaqartunut kommunit akissuteqartarnissaat naatsorsuutigineqarsinnaasariaqartoq. Akerlianilli aamma ataatsimiititaliaq isumaqarpoq tusarniaaffigisat qitiusut naatsorsuutigisaaq akimorlugu akissuteqannginnerat Naalakkersuisunit eqqumaffigineqartariaqartoq. Taamatut pisoqartillugu tusarniaaffigisat pineqartut Naalakkersuisut namminneq saaffigisariaqarfaat, tusarniaanermimi isumaqatigiinngissutaasinnaasunik qulaajaanissaaq kisimi siunertarineqarneq ajormat, akerlianilli soqutigisallit qitiusut akuutinnerisigut pitsaassuseqarluartumik inatsisiliornissaaq siunertarineqartarmat.

Ataatsimiititaliap siunnersuummik suliarinninnera

Suliffeqarfinni kommuninit pigineqartuni qularnaveeqqusiinissap akuersissutigineqarnissaanik Naalakkersuisut siunnersuutaqqaartumi piginnaatinneqarnerat pillugu kommuninit isornartorsiorneqartoq iluarsiissummik saqqummiussinermikkut Naalakkersuisut akuersaarat ataatsimiititaliamit maluginiarneqarpoq – piginnaatinneqarneq taanna iluarsiissuteqarnikkut manna kommunalbestyrelsimut tunniunneqarpoq. Qularnaveeqqusiinissamik qinnuteqaatit, kommunalbestyrelsimit isummerfigineqartussat, imarisassaar pillugit maleruagassiornissamut Naalakkersuisut siunnersuut malillugu suli piginnaatinneqarput. Tamanna qinnuteqaatit taamaattut imarisaat assigiimmik pitsaassusillit kommunini tamani atuunnissaannik qulakkeerinninnertut ataatsimiititaliamit isigineqarpoq. Kiisalu Naalakkersuisunut taama piginnaatitsissuteqarnikkut inatsimmik allannguutissamik saqqummiussisoqarnissaata utaqqineqarnissaanut taarsiullugu qinnuteqaatinut piumasaqaatit pisariaqartitsisoqalenera naapertorlugu iluarsineqartarnissaat periarfissinneqarpoq.

Siullermeerinninnerup kingorna siunnersuut allanngortitaq Naalakkersuisut kommuninut tusarniaassutiginasuarsimagaat ataatsimiititaliamit ilisimaneqarpoq. Kommunit qanoq qisuariarsimanerat aappassaaneerinninnissamut akissuteqaamminni nassuiaatigeqqullugu Naalakkersuisut ataatsimiititaliamit qinnuigineqarput.

Siunnersuutip aningaasaqarnikkut kingunerisassai

Qinnuteqaatit tiguneqartut suliarinissaannut kommunit allaffissornermut sulisunik aningaasanillu atuunnissaannik siunnersuut kinguneqassasoq Naalakkersuisut siunnersuummut nalinginnaasumik nassuiaatini allapput. Tassunga atatillugu Naalakkersuisut allapput, tamatum qanoq annertutiginnissaa missingerneqarsinnaanngitsoq. Taamaakkaluartoq ataatsimiititaliamit naatsorsuutigineqarpoq qinnuteqaatit kommuninit isummerfigineqartussat killilimmik amerlassuseqassasut, qinnuteqaatilli suliarinissaanni siunnersortinik kommunit atuisariaqarsinnaapput. Allaffissornikkut aningaasaqarnikullu naatsorsuutiginnngisamik siunnersuutip kinguneqaratarsinnaanera qisuariarfigineqarsinnaaqullugu ineriartorneq qanimut malinnaaffigeqqullugu Naalakkersuisut ataatsimiititaliamit kaammattorneqarput.

Ataatsimiititaliap inassuteqaatai

Siunnersuut akuerineqassasoq ataatsimiititaliap isumaqatigiittup inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

Karl Kristian Kruse,
Siulittaasup

Sara Olsvig
Siulittaasup tullia

Niels Thomsen

Mala Høy Kuko

Jess Svane

Aqqaluaq B. Egede

Tillie Martinussen